



Broj: 05-02-1-1194-13/16
Sarajevo, 7.4.2017. godine

ŽURNO

PARLAMENTARNA SKUPŠTINA BiH
- Zastupnički dom -

SARAJEVO

BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
PRIMLJENO: 10.04.2017			
Organizaciona jedinica	Klasifikaciona oznaka	Predmet broj	Broj priloga
01/02-02-1-		960	19

09304

PREDMET: Dostava Novi tekst - Prijedloga zakona o osiguranju depozita u bankama BiH

Vijeće ministara Bosne i Hercegovine je, na izvanrednoj sjednici održanoj 6.4.2017. godine, utvrdilo Novi tekst - Prijedlog zakona o osiguranju depozita u bankama Bosne i Hercegovine, usklađen sa Mišljenjem Zakonodavnopravnog sektora Parlamentarne skupštine Bosne i Hercegovine, te zaključilo da se isti uputi u Parlamentarnu skupštinu Bosne i Hercegovine uz prijedlog da se razmatra po žurnom postupku.

U opredjeljenju za razmatranje i usvajanje navedenog zakona po žurnom postupku, Vijeće ministara je imalo u vidu činjenicu da Novi tekst - Prijedlog zakona o osiguranju depozita u bankama Bosne i Hercegovine predstavlja jednu od obveza iz pisma namjere upućenog Međunarodnom monetarnom fondu - MMF-u. Ujedno napominjemo da je potrebno navedeni prijedlog zakona razmatrati istodobno sa Novim tekstom - Prijedlogom zakona o izmjenama i dopunama Zakona o trošarinama BiH, Novim tekstom - Prijedlogom zakona o izmjeni Zakona o sustavu neizravnog oporezivanja u Bosni i Hercegovini i Novim tekstom - Prijedlogom zakona o izmjenama i dopuni Zakona o uplatama na jedinstveni račun i raspodjeli prihoda.

Pored navedenog, podsjećamo da je Dom naroda Parlamentarne skupštine na 27. sjednici, održanoj 7.4.2017. godine, utvrdio Prijedlog navedenog zakona po žurnoj postupku, te suglasno tome, u privitku dostavljamo Novi tekst - Prijedlog zakona o osiguranju depozita u bankama Bosne i Hercegovine, na bosanskom, hrvatskom i srpskom jeziku i elektroničku verziju.

Suglasno navedenom, obavještavamo vas da povlačimo iz daljnje parlamentarne procedure Prijedlog zakona o osiguranju depozita u bankama Bosne i Hercegovine, koji je zaprimljen 29.3.2017. godine, u pisarnici Parlamentarne skupštine BiH.

S poštovanjem,



GENERALNI TAJNIK
Zvonimir Katleša

Na osnovu člana IV.4 a) Ustava Bosne i Hercegovine, Parlamentarna skupština Bosne i Hercegovine, na ____ sjednici Predstavničkog doma, održanoj __.__.2017. godine i na ____ sjednici Doma naroda, održanoj __.__.2017. godine, usvojila je

ZAKON
O OSIGURANJU DEPOZITA U BANKAMA
BOSNE I HERCEGOVINE

POGLAVLJE I. OPĆE ODREDBE

Član 1.
(Predmet)

- (1) Zakon o osiguranju depozita u bankama Bosne i Hercegovine (u daljem tekstu: Zakon) regulira osnivanje, status, djelatnost, upravljanje i rukovođenje, ovlaštenja, obaveze i finansiranje Agencije za osiguranje depozita Bosne i Hercegovine (u daljem tekstu: Agencija).
- (2) Cilj ovog zakona je da osigura, u okviru ograničenja određenih ovim zakonom, zaštitu depozita fizičkih i pravnih lica u bankama koje su dobile dozvolu za rad od Agencije za bankarstvo Federacije Bosne i Hercegovine (u daljem tekstu: FBA) ili Agencije za bankarstvo Republike Srpske (u daljem tekstu: RSAB) ili nasljednik(a) ovih agencija te time doprinese očuvanju sveukupne finansijske stabilnosti.

Član 2.
(Definicija)

U smislu ovog zakona:

- a) „**Agencija za bankarstvo**” je FBA ili RSAB ili nasljednik ovih agencija;
- b) „**Fond za osiguranje depozita**” (u daljem tekstu: Fond) je račun Agencije otvoren u skladu sa članom 13. ovog zakona;
- c) „**Ciljani iznos Fonda**”, je iznos sredstava koji je prema srednjoročnoj procjeni rizika dovoljan da osigura ispunjavanje zakonskog mandata Agencije;
- d) „**Deponent**” je fizičko ili pravno lice koja ima prikladan depozit u banci članici;
- e) „**Prikladan depozit**” je ukupan iznos svih sredstava koji rezultiraju iz depozita, štednih računa ili certifikata banke koje je deponent deponovao u banci članici umanjeno za isključenja iz člana 6. ovog zakona. Prikladni depoziti čine osnovicu za obračun premije osiguranja;
- f) „**Entitet**” je entitet Federacija Bosne i Hercegovine (u daljem tekstu: Federacija BiH) ili Republika Srpska;
- g) „**Vladin organ**” je domaći ili strani korisnik vladinih sredstava bez obzira na nivo vlasti, odnosno da li se radi o državnom, entitetskom, kantonalnom ili općinskom, kao i svako pravno lice uključujući penzione i zdravstvene fondove, koji su u vlasništvu ili pod kontrolom takvih korisnika vladinih sredstava;

- h) „**Grupa**“ je grupa preduzeća koja direktno ili indirektno kontroliraju banku članicu kao i supsidijarna osoba ovih preduzeća i banke članice;
- i) „**Slučaj osiguranja**“ je slučaj koji zahtijeva isplatu osiguranja depozita u skladu s odredbama ovog zakona;
- j) „**Osigurani depozit**“ je dio prikladnog depozita utvrđen odlukom Upravnog odbora Agencije koji je pokriven osiguranjem putem Fonda;
- k) „**Pravno lice**“ je svaka kompanija, preduzeće, udruženje, ustanova ili fondacija registrirana u BiH, izuzimajući vladine organe;
- l) „**Fizičko lice**“ je svaki pojedinac, bez obzira na državljanstvo ili nacionalnost;
- m) „**Banka**“ je pravno lice koje obavlja poslove primanja novčanih depozita i davanje kredita i druge poslove u skladu s entitetskim zakonima o bankama;
- n) „**Banka članica**“ je banka koja učestvuje u programu osiguranja depozita Bosne i Hercegovine u skladu s odredbama ovog zakona;
- o) „**Država**“ je Bosna i Hercegovina.

Član 3.

(Upotreba muškog ili ženskog roda)

Svi izrazi koji su, radi preglednosti, dati u jednom gramatičkom rodu odnose se, bez disriminacije, i na muški i na ženski rod.

POGLAVLJE II. OSIGURANJE DEPOZITA

Član 4.

(Osiguranje depozita)

- (1) Agencija osigurava sve prikladne depozite u bankama članicama u Bosni i Hercegovini.
- (2) Prilikom slučaja osiguranja, Agencija se obavezuje na naknadu osiguranih depozita dijela prikladnih depozita deponentima, u skladu s ograničenjem iz člana 5. i isključenim depozitima iz člana 6. ovog zakona.

Član 5.

(Ograničenje osiguranog depozita)

- (1) Najveći iznos osiguranog depozita zajedno s obračunatom kamatom, koji isplaćuje Agencija po deponentu po banci članici, iznosi prikladni depozit umanjen za zakonski ili ugovorni dug deponenta prema banci članici najviše do iznosa utvrđenog odlukom Upravnog odbora Agencije ili koji je manji.
- (2) Upravni odbor Agencije, na prijedlog direktora Agencije, donosi odluku o izmjeni visine iznosa osiguranog depozita i objavljuje je u „Službenom glasniku BiH“.
- (3) Odluka Upravnog odbora Agencije o visini iznosa osiguranog depozita je sastavni dio ugovora o osiguranju depozita.
- (4) Za svrhe isplate, sva sredstva deponenta u stranoj valuti preračunavaju se u konvertibilnu marku (u daljem tekstu: KM) na osnovu prosječnog deviznog kursa Centralne banke Bosne i Hercegovine (u daljem tekstu: Centralna banka) na dan slučaja osiguranja.

- (5) Obračunata kamata na prikladne depozite obračunava se samo do dana slučaja osiguranja.
- (6) Ako je deponent vlasnik zajedničkog računa, udio svakog deponenta u zajedničkom računu obračunava se jednako između vlasnika računa osim ako svi vlasnici računa dostave dokaz o suprotnom. Ukupna isplata po zajedničkom računu ograničena je na iznos definiran ovim zakonom po jednom deponentu po banci članici.
- (7) Nakon obavještenja o spajanju, odnosno pripajanju, transformaciji ili sličnoj operaciji, deponenti imaju na raspolaganju rok od tri mjeseca da, bez plaćanja penala, povuku ili prenesu na drugu banku članicu svoje prikladne depozite uključujući svu pripisanu kamatu i naknade ako isti u trenutku operacije premašuju nivo pokrića.

Član 6. **(Isključeni depoziti)**

Prikladni depoziti ne uključuju slijedeća sredstva :

- a) depoziti za koje je odlukom suda utvrđeno da su stečeni protuzakonitim radnjama i koji nisu predmet dalje žalbe;
- b) depoziti koji se drže na računima čiji naziv nije transparentan u smislu vlasništva ili nenominovani depoziti;
- c) depoziti koji se čuvaju u sefovima banaka;
- d) depoziti koji se čuvaju u aranžmanu pohranjivanja s bankom, osim namjenskih depozita;
- e) depoziti drugih domaćih ili stranih banaka koje drže u svoje ime i za svoj račun;
- f) depoziti domaćih ili stranih vladinih organa;
- g) depoziti domaćih i stranih osiguravajućih društava;
- h) depoziti domaćih i stranih organa za kolektivna ulaganja;
- i) depoziti domaćih i stranih penzionih fondova koji se ne smatraju vladinim organima;
- j) depoziti lica u posebnom odnosu sa bankom kako je definisano entitetskim zakonima o bankama;
- k) depoziti kompanija iste grupe kao i banka članica;
- l) depoziti koje je deponent stekao od iste banke članice prema stopama ili drugim finansijskim ustupcima koji su mogli doprinijeti ugrožavanju finansijskog stanja banke članice;
- m) depoziti preduzeća koja mogu biti isključena iz pokrića osiguranja nekim posebnim zakonom ili vladinim uputstvom;
- n) dugovni vrijednosni papiri koje je izdala banka članica i sve druge obaveze banke članice koje proizilaze iz takvih akceptnih naloga i mjenica;
- o) depoziti mikrokreditnih organizacija.

Član 7.

(Učešće u članstvu)

- (1) Sve banke koje su dobile dozvolu za rad od nadležne agencije za bankarstvo su obavezno članice Agencije.
- (2) Prije izdavanja dozvole za rad novoj banci, Agencija se obavještava od nadležne agencije za bankarstvo i dostavljaju joj se informacije o podnosiocu dozvole za rad.
- (3) Banka dostavlja Agenciji primjerak posljednjeg revidiranog finansijskog izvještaja od eksterne revizije, obavljene u skladu s međunarodnim računovodstvenim standardima ili početni bilans stanja za novoosnovane banke.

Član 8.

(Praćenje kvaliteta poslovanja banaka)

- (1) Agencija kontinuirano prati poslovanje banaka članica, u cilju informiranosti i pripreme za izvršavanje obaveza iz svoje nadležnosti.
- (2) Način praćenja banaka članica vrši se u skladu sa standardima kvaliteta koje svojom odlukom propisuje Upravni odbor Agencije. Standardi kvaliteta će se oslanjati na standarde definirane entitetskim zakonima o bankama i minimalnim zahtjevima o upravljanju rizicima u bankama, na način propisan od nadležnih agencija za bankarstvo.
- (3) Upravni odbor Agencije, radi usklađivanja s propisima nadležnih agencija za bankarstvo, redovno razmatra odluku o standardu kvalitete poslovanja banaka članica.

Član 9.

(Obaveze banaka)

- (1) Banke su obavezne, u propisanim rokovima, Agenciji dostavljati
 - a) izvještaje propisane od nadležnih agencija za bankarstvo ili njenih sljednika;
 - b) izvještaje eksterne revizije, i
 - c) izvještaje propisane od Agencije.
- (2) U cilju kontinuiranog praćenja poslovanja banaka članica, radi ispunjavanja standarda kvaliteta, Agencija će izvršiti ocjenu dokumenata iz stava (1) ovog člana te vršiti uvid na licu mjesta radi potvrde primljene informacije.
- (3) Agencija propisuje način vođenja evidencija depozita u bankama članicama radi izvještavanja o podacima relevantnim za Agenciju, što se regulira ugovorom o članstvu.
- (4) S ciljem provjere tačnosti izvještavanja prema Agenciji, a u skladu sa ugovorom o osiguranju depozita, Agencija će vršiti praćenje izvršavanja obaveza izvještavanja banaka po ugovoru.
- (5) Banka članica dužna je, u svakom trenutku, Agenciji učiniti učini dostupnim podatke o deponentima i njihovim depozitima, u obliku i na način kako to Agencija zahtjeva.

Član 10.

(Ugovor i certifikat o članstvu)

- (1) Svaka banka članica potpisuje ugovor o članstvu sa Agencijom, pripremljen u trenutku pristupa programu osiguranja depozita.
- (2) Ugovor o članstvu isti je za svaku banku članicu i sadrži precizirana prava i obaveze Agencije i banke članice i odgovarajuće procedure objavljivanja koje Agencija mora poštivati pri isplati osiguranja depozita.
- (3) Nova banka postaje članica programa osiguranja depozita pod uslovom da uplati jednokratnu naknadu za certifikat o članstvu, koji izdaje Agencija. Članstvo se ostvaruje po okončanju obje aktivnosti.
- (4) Upravni odbor Agencije, na prijedlog direktora Agencije, određuje visinu naknade za certifikat za članstvo čija odluka se objavljuje u "Službenom glasniku BiH".
- (5) Naknada za certifikat za članstvo istog je iznosa za sve banke članice i koristi se za izmirenje troškova nastalih u tekućem odnosu s bankama članicama.

Član 11.

(Promotivni materijal)

- (1) Banka članica dužna je deponentima i zainteresovanim licima pružiti informacije o osiguranju depozita utvrđene ovim zakonom, a posebno informacije o visini i načinu isplate iznosa osiguranog depozita.
- (2) Informacije iz stava (1) ovog člana moraju biti razumljive i dostupne u pisanoj formi.
- (3) Informacije iz stava (1) ovog člana banka ne može upotrebljavati u reklamne svrhe, niti na način koji ugrožava stabilnost bankarskog sistema i povjerenje deponenata.
- (4) Agencija će osigurati promotivni materijal, uključujući i znak Agencije, koji je svaka banka članica dužna otvoreno i u svakom trenutku imati izložen.
- (5) Banka članica može i samostalno osigurati promotivni materijal koji dokazuje njeno članstvo u osiguranju depozita, pod uslovom da je dizajn materijala kompatibilan sa zvaničnim znakom Agencije.
- (6) Dizajn, sadržaj i upotrebu svog promotivnog materijala odobrava Agencija.
- (7) Banke članice obavještavaju postojeće i potencijalne deponente o primjenjivim isključenjima iz zaštite programa osiguranja depozita.
- (8) Prije sklapanja ugovora o primanju depozita, deponentima se pružaju opće informacije koje osigurava Agencija. Deponenti potvrđuju prijem takvih informacija.
- (9) Potvrda o prikladnosti depozita dostavlja se deponentima na njihovim izvodima računa, uz upućivanje na informativni obrazac, na kojem se navodi internet adresa Agencije. Informativni obrazac dostavlja se deponentu najmanje jednom godišnje.
- (10) Internet stranica Agencije sadrži informacije potrebne deponentima, a posebno informacije u vezi s postupkom i uslovima osiguranja depozita.

Član 12.

(Premija osiguranja)

- (1) Nakon izuzeća člana 6. tačke m) ovog zakona, i isključenja sredstava definiranih u članu 6. tč. a) do l) i tč. n) i o) ovog zakona, prosječni prikladni depoziti na kraju svakog mjeseca uvećani za obračunatu kamatu koriste se kao osnovica premije osiguranja banke članice koja učestvuje u osiguranju depozita.
- (2) Uplata premije osiguranja vrši se tromjesečno unaprijed do prvog dana svakog tromjesečja, na bazi prosječnog stanja prikladnih depozita u prethodnom tromjesečju. Tromjesečja počinju prvog dana januara, aprila, jula i oktobra.
- (3) Agencija, svakoj banci članici, dostavlja fakturu za uplatu premije osiguranja depozita najkasnije 10 dana prije isteka roka za plaćanje premije.
- (4) Ugovor o članstvu definiše procedure za obračun premije koju plaća banka članica.
- (5) Upravni odbor Agencije, na prijedlog direktora Agencije a najmanje jednom godišnje, utvrđuje visinu stope premije osiguranja za sve banke članice.
- (6) Na početku četvrtog kalendarskog tromjesečja, Agencija objavljuje važeću stopu premije osiguranja i stopu koja će se primjenjivati u narednoj kalendarskoj godini. Agencija zadržava pravo izmjene stope uvijek u skladu s potrebama Agencije, s tim da nova stopa premije osiguranja stupa na snagu u narednom kalendarskom tromjesečju od trenutka obavještanja banaka članica.
- (7) Odluka o visini stope premije objavljuje se u „Službenom glasniku BiH” prije nego izmijenjena stopa premije osiguranja stupi na snagu.
- (8) Odluka Upravnog odbora Agencije o visini stope premije osiguranja sastavni je dio ugovora o osiguranju depozita.
- (9) Upravni odbor Agencije uspostavlja sistem rangiranja radi utvrđivanja visine stope premije osiguranja za pojedinačne banke članice proizašle iz tog rangiranja. Izuzetno, Upravni odbor Agencije u istu svrhu prihvata sistem rangiranja relevantne agencije za bankarstvo.
- (10) U slučaju da sredstva Fonda za osiguranje depozita nisu dovoljna za isplatu osiguranih depozita prilikom nastupanja slučaja osiguranja, dodatna sredstva osiguravaju se naplatom vanredne premije osiguranja.
- (11) U slučaju da je Agencija dala doprinos za finansiranje restrukturiranja i pretrpjela veće gubitke od gubitaka koje bi imala u postupku likvidacije ili stečaja, Agenciji će se nadoknaditi iznos gubitka koji je nastao u postupku restrukturiranja banke članice naplatom vanredne premije osiguranja u Fond.
- (12) Odluku o naplati vanredne premije osiguranja, njenoj visini i modalitetima naplate donosi Upravni odbor Agencije i ona se objavljuje u „Službenom glasniku BiH“.

Član 13.

(Fond za osiguranje depozita)

- (1) Agencija otvara račun Fonda u Centralnoj banci na koji deponuje premije banaka članica.
- (2) Sredstva premije osiguranja iz člana 12. ovog zakona koriste se isključivo za povećanje kapitala Fonda.
- (3) Fond može prihvatiti i sredstva pribavljena putem donacija odobrena od Upravnog odbora Agencije. Sredstva Fonda čine i sredstva ostvarena naplatom po osnovu subrogacije iz likvidacione i stečajne mase banke i troškova postupka u vezi isplate osiguranih depozita i troškova postupka u vezi restrukturiranja banaka.
- (4) Sredstva Fonda za osiguranje depozita ne mogu biti predmet izvršenja, izuzev po osnovu obaveze Agencije na isplatu osiguranog depozita i učešća u postupku restrukturiranja banaka članica.
- (5) Agencija investira kapital Fonda u skladu s Politikom investiranja koju je donio Upravni odbor Agencije, na prijedlog direktora Agencije (u daljem tekstu: Politika investiranja).
- (6) Agencija investira kapital Fonda u vrijednosnice s fiksnim prihodom, izdate ili garantirane od zemalja Evropske unije, vladinih agencija zemalja Evropske unije, evropske nadnacionalne agencije i u vrijednosnice s fiksnim prihodom izdate ili garantirane od vlade ili vladinih agencija Sjedinjenih Američkih Država.
- (7) Agencija može ulagati kapital Fonda u vrijednosnice s fiksnim prihodom ili druge instrumente duga koje su izdale kompanije Evropske unije ili kompanije sa sjedištem u Sjedinjenim Američkim Državama s najvišom ocjenom. Minimalna ocjena kvaliteta ovih kompanija je „A“ ili „P1“ ili bolja ili ekvivalent u skladu s ocjenama međunarodno priznate agencije za ocjenu obveznica.
- (8) Sve investicije Fonda, u skladu s Politikom investiranja, preduzimaju se uz zaštitu njegovog kapitala i zadržavanja likvidnosti.

Član 14.

(Prestanak članstva uz isplatu osiguranja)

- (1) Prestanak članstva u programu osiguranja depozita, osim u slučajevima iz člana 17. ovog zakona, rezultat je mjere agencije za bankarstvo i banke članice.
- (2) Nakon zvaničnog obavještenja o gubitku dozvole banke članice, direktor Agencije dužan je o tome obavijestiti Upravni odbor Agencije.
- (3) Naknadni gubitak članstva u programu osiguranja depozita, iz razloga definiranih ovim članom, potvrđuje se odlukom Upravnog odbora Agencije na prijedlog direktora Agencije.
- (4) Agencija objavljuje odluku u „Službenom glasniku BiH“ i o tome obavještava FBA ili RSAB ili njihove nasljednike.
- (5) Kada banka članica dobije obavještenje iz stava (2) ovog člana o prestanku njenog učešća u osiguranju depozita, o tome odmah obavještava sve postojeće deponente, zvanično i u pismenoj formi.
- (6) U slučaju isplate osiguranja depozita, prava deponentata ograničena na iznos isplate osiguranja, zakonski se prenose na Agenciju, na *cessio legis* način.

Član 15.

(Gubitak dozvole za rad banke članice kao mjera Agencije za bankarstvo)

- (1) Isplata osiguranja depozita ograničava se situaciju u slučaju gubitka dozvole za rad banke članice, kao mjera Agencije za bankarstvo.
- (2) U skladu sa odredbama člana 5., 6. i 14. ovog zakona, Agencija je dužna deponentima staviti na raspolaganje osigurane iznose prikladnih depozita bez neopravdanog kašnjenja, najkasnije u roku od 20 radnih dana od dana oduzimanja dozvole za rad banci članici.
- (3) Agencija ima pravo da vrši privremene isplate u situacijama kada može postojati produženo kašnjenje procesa isplate.

Član 16.

(Obaveze deponenata)

- (1) U slučaju iz članova 14. i 15. ovog zakona, deponenti uz zahtjev za isplatu dostavljaju dokaz zakonskog vlasništva nad depozitom za koji se potražuje naknada,
- (2) Zahtjevi za isplatu potraživanja deponenata zastarjevaju u roku od pet godina od dana gubitka dozvole za rad banke članice, bez obzira na razlog isplate osiguranja u banci članici.
- (3) Agencija isplaćuje i deponente koji su pravo na isplatu stekli na osnovu pravosnažne sudske presude.

Član 17.

(Suspenzija ili prestanak članstva bez isplate osiguranja)

- (1) Do prestanka članstva u programu osiguranja depozita bez isplate osiguranja, koji nisu u vezi s razlozima iz člana 14. ovog zakona, dolazi u skladu s odlukom Upravnog odbora Agencije o suspenziji, na prijedlog direktora Agencije.
- (2) O odluci iz stava (1) ovog člana, Agencija obavještava FBA i RSAB ili njihove nasljednike.
- (3) Odluka Agencije je konačna i obavezujuća. Odluka se može osporavati u postupku pred Sudom Bosne i Hercegovine.
- (4) Odluka se objavljuje u „Službenom glasniku BiH“.
- (5) Po prijemu odluke iz stava (1) ovog člana, banka članica izdaje obavještenje konvencionalnim metodama publikacija i izvještavanja da budući depoziti neće biti osigurani.

Član 18.

(Obavještavanje deponenata)

- (1) U roku od 10 dana prije stupanja na snagu odluke iz člana 17. ovog zakona, Agencija izdaje obavještenje o okolnostima i razlozima za donošenje odluke o suspenziji članstva bez isplate osiguranja, konvencionalnim metodama publikacije i izvještavanja. Obavještenje se objavljuje u „Službenom glasniku BiH“.
- (2) Postojeći (uplaćeni) depoziti su osigurani do isteka roka od tri mjeseca ili do dospelja od dana suspenzije ili prestanka osiguranja depozita, o čemu Agencija obavještava deponente.

Član 19.

(Suspenzija osiguranja depozita bez isplate osiguranja)

- (1) Suspenzija osiguranja depozita ograničava se na situacije neplaćanja naknade za članstvo od strane banke članice ili neplaćanja premije osiguranja za jedno tromjesjeće.
- (2) Depoziti fizičkih lica primljeni prije dana suspenzije osiguranja depozita, u skladu s ovim članom, ostaju osigurani na slijedeći način:
 - a) 90 dana nakon suspenzije osiguranja depozita, ili
 - b) do dana dospeljeća pojedinog depozita, u zavisnosti koji je rok duži.
- (3) Ovi će depoziti biti osigurani na istom nivou od dana kada je banka članica bila obaviještena o suspenziji njenog osiguranja depozita.
- (4) Novi depoziti, ili dodatna sredstva koja su dodata postojećim prikladnim depozitima, koji su primljeni poslije dana kada je banka članica obaviještena o suspenziji osiguranja, neće biti osigurani.
- (5) Od banke članice zahtjeva se da poslije dana suspenzije depozita nastavi izvještavanje i plaćanje premije Agenciji dok god postoji osiguranje depozita zbog dospeljeća depozita, a iznos premije zasnivati će se samo na onim depozitima koji su osigurani.
- (6) Banka članica mora vratiti Agenciji svoj originalni certifikat o članstvu u roku od pet radnih dana od dana kada je primila obavještenje o suspenziji svojih depozita te u istom roku ukloniti iz svih svojih prostorija sve oznake Agencije kao i promotivni materijal. Ako banka članica ponovo uspostavi svoje učešće u osiguranju depozita prije ukidanja njenog članstva u osiguranju depozita, originalni certifikat o članstvu bit će vraćen ponovno primljenoj banci članici bez potpisivanja novog ugovora o članstvu ili procjene nove naknade za certifikat.

Član 20.

(Ukidanje osiguranja depozita bez isplate osiguranja)

- (1) Ukidanje osiguranja depozita ograničava se na situacije neplaćanja premije osiguranja od banke članice više od jednog uzastopnog kvartala.
- (2) Depoziti primljeni prije dana ukidanja osiguranja depozita shodno ovom članu i dalje će biti osigurani samo prema odredbama i ograničenjima člana 19. ovog zakona.
- (3) Ako banka članica vrati svoje članstvo u osiguranju depozita ali samo poslije ukidanja njenog učešća u osiguranju depozita, originalni certifikat o članstvu neće biti vraćen ponovno primljenoj banci članici već će se izdati novi certifikat o članstvu i procijenit će se naknada za certifikat o članstvu.

Član 21.

(Uslovi za korištenje sredstava Fonda u procesu restrukturiranja banaka članica)

- (1) Kada nadležna agencija za bankarstvo preduzme mjere restrukturiranja banke članice, pod uslovom da takve mjere osiguravaju da deponenti i dalje imaju pristup svojim depozitima,

Agencija će obezbijediti sredstva za finansiranje procesa restrukturiranja u skladu sa ovim zakonom i to:

- a) kada se vrši unutrašnje restrukturiranje banke članice vlastitim sredstvima, za iznos koji bi pretrpjeli osigurani deponenti u slučaju da su njihovi osigurani depoziti bili uključeni u raspodjelu gubitka i bili otpisani do jednakog iznosa kao i povjerioci i istim redoslijedom prioriteta u skladu sa zakonima kojim se uređuje rad banaka;
- b) kada se primjenjuje drugi instrument restrukturiranja, u iznosu gubitaka koje bi pretrpjeli deponenti po osnovu osiguranih depozita da su učestvovali sa drugim povjericima istog isplatnog reda u pokriću tih gubitaka u skladu sa zakonom kojim se uređuje rad banaka.
- (2) Agencija nije obavezna pružiti doprinos u dokapitalizaciji banke članice u postupku restrukturiranja, banke za posebne namjene ili društva za upravljanje imovinom, ali može dati doprinos u resorpciji gubitka.
- (3) Iznos sredstava Fonda koji se koristi za finansiranje restrukturiranja banke članice ne može preći iznos koji bi bio isplaćen iz sredstava Fonda u slučaju da je, umjesto restrukturiranja banke članice, nad bankom članicom pokrenut postupak likvidacije ili stečaja kako je utvrđeno nezavisnom procjenom, u skladu sa entitetskim zakonima o bankama.
- (4) Učešće sredstava Fonda u restrukturiranju banke članice ne može preći gubitke koje bi Fond pretrpio da je nad bankom članicom pokrenut postupak stečaja ili likvidacije, odnosno gubitak predstavlja razliku između isplaćenog iznosa i iznosa hipotetičke naplate.
- (5) Fond se uključuje u proces finansiranja restrukturiranja banaka članica samo u slučaju kada ukupni doprinos Fonda finansiranju restrukturiranja banke članice ne prelazi 50% ciljanog iznosa Fonda. Korištenje sredstava Fonda u procesu restrukturiranja odlukom potvrđuje Upravni odbor Agencije.
- (6) Kada se osigurani depoziti banke članice, u procesu restrukturiranja banke, prebacuju na treće pravno lice na osnovu instrumenta prodaje poslovanja ili instrumenta prenosa na banku za posebne namjene, deponenti ne ostvaruju pravo potraživanja od Agencije u pogledu bilo kojeg dijela njihovog depozita u banci članici koja je pod procesom restrukturiranja a koji nisu preneseni, pod uslovom da je iznos prenesenih depozita jednak ili veći od ukupnog osiguranog iznosa određenog odlukom Upravnog odbora Agencije.
- (7) Banka članica koje je restrukturirana ili je učestvovala u procesu restrukturiranja mora biti sposobna da obezbijedi kontinuitet svojih osnovnih funkcija i ključnih poslovnih aktivnosti.
- (8) Ukoliko Agencija, u postupku restrukturiranja banke članice, pretrpi gubitke veće od gubitaka koje bi pretrpjela u likvidacionom ili stečajnom postupku, a što se utvrđuje nezavisnom procjenom u skladu sa entitetskim zakonima o bankama, ostvaruje pravo na naknadu razlike do visine gubitka koji bi pretrpjela u likvidacionom ili stečajnom postupku iz sredstava vanredne premije osiguranja.

POGLAVLJE III. AGENCIJA ZA OSIGURANJE DEPOZITA

Član 22. (Osnivanje)

- (1) Ovim zakonom osniva se Agencija za osiguranje depozita Bosne i Hercegovine.

- (2) Agencija ima sjedište u Banja Luci i filijale u Sarajevu i Banja Luci. Agencija može otvoriti i dodatne jedinice, ako su fiskalno održive od dana otvaranja. Agencija može svoje funkcije na nivou Agencije dodijeliti između lokacija filijala.
- (3) Filijale, ili druge organizacione jedinice, nemaju pravni status niti ovlaštenja neovisno od Agencije. Svaka dodatna organizaciona jedinica Agencije osniva se jedino odlukom Upravnog odbora Agencije BiH. i Upravni odbor Agencije imenuje direktore svih organizacionih jedinica Agencije.
- (4) Agencija je samostalno, neprofitno pravno lice s punim ovlaštenjem u skladu sa zakonom države. Naročito, Agencija ima ovlaštenje za sklapanje ugovora, nabavku i raspolaganje pokretnom i nepokretnom imovinom i da bude strana u pravnom procesu.
- (5) Agencija ima pečat u skladu sa Zakonom o pečatu institucija Bosne i Hercegovine („Službeni glasnik BiH“ 12/98, 14/03 i 62/11). Filijale imaju pečat, koji dodatno sadrže naziv i sjedište filijale.

Član 23. **(Obaveze i ovlasti)**

- (1) Osnovni zadaci Agencije su:
 - a) osiguranje prikladnih depozita fizičkih i pravnih lica u bankama članicama u skladu s ovim zakonom;
 - b) izdavanje certifikata o članstvu bankama;
 - c) oduzimanje, putem suspenzije ili okončanja, certifikata o članstvu;
 - d) investiranje sredstava koja čine Fond za osiguranje depozita u skladu s ograničenjima Politike investiranja Agencije i u skladu s ovim zakonom;
 - e) isplata osiguranja depozita u slučaju prestanka rada banke članice, u skladu s ovim zakonom;
 - f) donošenje podzakonskih akata kojima se regulira osiguranje depozita i poslovanje Agencije, u skladu s ovim zakonom;
 - g) učešće u procesu restrukturiranja banaka.
- (2) U slučaju da se Agencija i banka članica ne mogu usaglasiti u vezi sa tačnošću izvještaja potrebnih u skladu s ovim zakonom ili odlukom Upravnog odbora Agencije, Agencija ima pravo zahtijevati reviziju poslovanja banke članice i angažirati nezavisnog revizora radi ocjene tačnosti izvještaja koje je banka članica dostavila Agenciji. Troškove ove revizije snosi strana čije se tumačenje, ocjenom revizije, utvrdi kao pogrešno.
- (3) Kada Agencija utvrdi da banka članica ne ispunjava obavezu plaćanja premije osiguranja Agenciji ili ne ispunjava druge finansijske obaveze prema Agenciji, Agencija ima pravo da:
 - a) zvanično obavijestiti FBA ili RSAB ili njihove nasljednike da Agencija planira preduzeti mjere u vezi s aktivnosti banke članice ili stanja koje može uticati na članstvo te banke u Fondu;
 - b) podnijeti tužbu nadležnom sudu;
 - c) uvesti proces suspenzije ili okončanja.

- (4) Agencija ima pravo provjeriti sve ili pojedine prikladne depozite u svojim bankama članicama i tražiti podatke o prikladnim depozitima pismenim putem. Banka članica dužna je potvrditi prijem zahtjeva u roku od dva radna dana od dana prijema zahtjeva i postupiti po zahtjevu za informacijama o depozitima u roku 10 radnih dana od dana prijema zahtjeva.

Član 24.

(Samostalnost i imunitet)

- (1) Agencija samostalno rukovodi poslovanjem, u skladu s obavezama i ovlaštenjima dodijeljenih joj na osnovu ovog zakona.
- (2) Od dana osnivanja Agencije, direktor Agencije, direktori filijala i njihovo osoblje, kao i druga lica preporučena ili imenovana od Agencije za obavljanje određenih radnji u okviru ovog zakona, ne mogu se goniti u krivičnom ili građansko-pravnom postupku za bilo koje radnje koje su izvršili u dobroj namjeri i u skladu s ovim zakonom tokom izvršenja ili provođenja zadataka u okviru svojih ovlaštenja.
- (3) Agencija snosi ili nadoknađuje troškove za sadašnje i bivše uposlenike, bez obzira na položaj, za sve pravne sporove inicirane protiv uposlenog, iz bilo kog izvora, za radnje preduzete u dobroj namjeri prilikom izvršenja ili provođenja zadataka u okviru ovlaštenja propisanih ovim zakonom ili drugih delegiranih ovlaštenja ukoliko ti troškovi ne mogu biti naplaćeni od strane koja je podnijele tužbu protiv Agencije ili njenog osoblja.

Član 25.

(Statut Agencije)

- (1) Statutom Agencije uređuju se:
 - a) organizacija i način poslovanja Agencije;
 - b) nadležnost i način rada Agencije;
 - c) ovlaštenja za sva zastupanja Agencije;
 - d) prava, obaveze i odgovornosti osoba koje obavljaju poslove i zadatke sa posebnim ovlaštenjima i odgovornostima; i
 - e) druga organizaciona pitanja u vezi s poslovanjem Agencije.
- (2) Upravni odbor obavezno razmatra Statut Agencije najmanje jednom godišnje, radi eventualnog usklađivanja s izmjenom propisa koji direktno ili indirektno utiču na ovaj zakon.

Član 26.

(Sastav Upravnog odbora)

- (1) Agencijom upravlja jedino Upravni odbor.
- (2) Upravni odbor čini pet članova. Sastav i izbor članova Upravnog odbora propisan je ovim zakonom.
- (3) Guverner Centralne banke i ministar finansija i trezora Bosne i Hercegovine, ili lica koje oni ovlaste, su *ex officio* članovi Upravnog odbora.
- (4) Upravni odbor Centralne banke može imenuje jednog člana Upravnog odbora, a ministar finansija Federacije Bosne i Hercegovine i ministar finansija Republike Srpske imenuju po jednog člana Upravnog odbora, u skladu s ograničenjima relevantnih entitetskih zakona.

- (5) Članovi Upravnog odbora koji to nisu *ex officio*, moraju biti osobe koje su stekle visok ugled finansijskog i bankarskog stručnjaka i koje posjeduju visoke moralne osobine za vršenje povjerenih im dužnosti.
- (6) Upravni odbor, od svojih članova, bira predsjedavajućeg i zamjenika predsjedavajućeg.
- (7) Direktori agencija za bankarstvo su članovi Upravnog odbora bez prava glasa i ne mogu vršiti dužnost predsjedavajućeg ili zamjenika predsjedavajućeg.
- (8) Pojedinci koji su predloženi za članove Upravnog odbora moraju predložiti pismenu izjavu kao dokaz njihove kvalificiranosti i potvrdu prihvatanja u slučaju njihovog imenovanja.
- (9) Mandat članova Upravnog odbora je pet godina. Mandat se može obnoviti najviše dva puta uzastopno.
- (10) Odredbe o trajanju i ograničenjima mandata ne primjenjuju se za lica koja tu dužnost vrše *ex officio*.
- (11) Svaka osoba, osim članova koji su *ex officio* članovi, može biti imenovana za člana Upravnog odbora Agencije, samo na dva uzastopna mandata tako da prilikom imenovanja za slijedeći mandat, najmanje dva člana iz prethodnog saziva Upravnog odbora budu imenovana.
- (12) Član Upravnog odbora ne može biti u srodstvu, po pravoj ili pobočnoj liniji zaključno s trećim stepenom srodstva ili u braku, međusobno ili sa direktorom Agencije ili direktorom organizacione jedinice.
- (13) Član Upravnog odbora, za vrijeme mandata, ne može obavljati funkciju u izvršnoj vlasti ili biti član nadzornog odbora, uprave, zaposlenik banke članice ili bilo koje druge banke u državi koja ima dozvolu za rad.
- (14) Član Upravnog odbora ili lice koje je s njim u srodstvu, po pravoj ili pobočnoj liniji zaključno s trećim stepenom srodstva ili u braku, ne može imati, direktno ili indirektno, više od pet procenata kapitala banke članice. O interesima koje u banci članici ima član Upravnog odbora ili lice koje je s njim u srodstvu, po pravoj ili pobočnoj liniji zaključno s trećim stepenom srodstva ili u braku, dužan je obavijestiti Upravni odbor u pisanoj formi.
- (15) Član Upravnog odbora dužan je, u pisanoj formi, obavijestiti Agenciju o interesima koje ima on ili lice koje je s njim u srodstvu, po pravoj ili pobočnoj liniji zaključno s trećim stepenom srodstva ili u braku u nekoj drugoj banci ili komercijalnom preduzeću u kojem posjeduju više od pet procenata kapitala banke ili preduzeća.

Član 27.

(Smjena, suspenzija i otpuštanje članova Upravnog odbora)

- (1) Većina članova Upravnog odbora ima pravo smijeniti člana Upravnog odbora u vezi s radom u Upravnom odboru. Naknadno imenovanje pojedinca za upražnjeno mjesto bit će obavljeno u skladu s ovim zakonom vezano za ovlaštenja imenovanja u članstvo za mjesto smijenjenog člana.
- (2) Dužnost je i obaveza Upravnog odbora da obavijesti Vijeće ministara Bosne i Hercegovine o krivičnom ili nezakonitom postupanju bilo kojeg člana Upravnog odbora.
- (3) Član Upravnog odbora za slučaj ponašanja suprotno članu 26. st. (12) do (15) ovog zakona automatski se suspendira s dužnosti.

- (4) Svaki član Upravnog odbora odgovoran je za obavješćavanje Upravnog odbora o svom statusu iz člana 26. st. (12) do (15) ovog zakona.
- (5) Za vrijeme obavljanja dužnosti u Upravnom odboru, članovi Upravnog odbora ne mogu biti gonjeni u krivičnom ili građansko-pravnom postupku, za aktivnosti koje su preduzeli u skladu s ovim zakonom i u dobroj namjeri u skladu s njihovim dužnostima kao članovima Upravnog odbora.
- (6) Član Upravnog odbora Agencije, na lični zahtjev, može biti razriješen dužnosti prije isteka mandata.
- (7) Lice koje je imenovano za člana Upravnog odbora umjesto člana koji je smijenjen, suspendiran ili razriješen dužnosti, obavlja dužnost člana Upravnog odbora do isteka mandata njegovog prethodnika.

Član 28. (Sjednice)

- (1) Sjednice Upravnog odbora održavaju se najmanje jednom u tri mjeseca (jedanput svakog kalendarog tromjesečja), ali se po potrebi mogu održavati i češće na *ad hoc* osnovi.
- (2) Sastanci Upravnog odbora održavat će se naizmjenično, na lokacijama organizacionih jedinica Agencije.
- (3) Sjednice Upravnog odbora saziva predsjedavajući Upravnog odbora.
- (4) Predsjedavajući Upravnog odbora može sazvati i posebnu sjednicu, na zahtjev direktora Agencije ili na zahtjev dva člana Upravnog odbora, u roku od 14 dana od dana prijema zahtjeva.
- (5) Ukoliko predsjedavajući Upravnog odbora ne postupi u skladu sa zahtjevom iz stava (4) ovog člana, podnosilac zahtjeva ovlašten je sazvati posebnu sjednicu.
- (6) Pismeni poziv za sjednicu Upravnog odbora sadrži datum, vrijeme početka, mjesto održavanja sjednice i dnevni red i dostavlja se članovima Upravnog odbora najkasnije sedam dana prije održavanja sjednice. Materijal za svaku tačku dnevnog reda prilaže se uz poziv na sjednicu.
- (7) Osobe koje nisu članovi Upravnog odbora mogu prisustvovati sjednici, uz pismeni poziv predsjedavajućeg.
- (8) Za održavanje sjednice Upravnog odbora potreban je kvorum većine ukupnog broja članova. Upravni odbor donosi odluke na osnovu većine glasova ukupnog broja članova.
- (9) Predsjedavajući ili član Upravnog odbora ne glasa o pitanjima vezana za njega lično.
- (10) Direktor Agencije i direktor filijale prisustvuje svim sjednicama Upravnog odbora, bez prava glasa. Predsjedavajući Upravnog odbora može donijeti odluku da direktor Agencije i direktor filijale ne prisustvuju sjednici Upravnog odbora. Takva odluka predsjedavajućeg Upravnog odbora mora biti obrazložena Upravnom odboru, direktoru Agencije i direktoru filijale.
- (11) Svaka agencija donator ili zemlja donator, strana ili domaća, može imenovati savjetnika Upravnog odbora. Prava i obaveze savjetnika reguliraju se sporazumom između Agencije i zemlje donatora ili agencije donatora.

Član 29.
(Dužnosti Upravnog odbora)

Upravni odbor:

- a) imenuje direktora Agencije i direktore filijala Agencije;
- b) bira predsjedavajućeg i zamjenika predsjedavajućeg Upravnog odbora;
- c) donosi Statut Agencije i druge opće akte;
- d) donosi sve propise, politike, uputstva i naknade za upravljanje i poslovanje Agencije i njenog Fonda u skladu s ovim zakonom, zakonima države ili u skladu s praksom zdravog upravljanja;
- e) pregleda godišnje ovaj zakon u vezi sa Zakonom o bankama;
- f) utvrđuje i odobrava stručnu kvalificiranost direktora Agencije i direktora filijala;
- g) donosi Odluku o standardima kvaliteta poslovanja banaka članica;
- h) odobrava, na prijedlog direktora Agencije, učešće banaka u članstvu i prekide članstva banaka članica;
- i) donosi finansijski plan Agencije na prijedlog direktora Agencije;
- j) donosi Politiku investiranja Fonda na prijedlog direktora Agencije;
- k) donosi, na prijedlog direktora Agencije, odluku o visini stope premije osiguranja i vanredne premije osiguranja koja se naplaćuje od banaka članica;
- l) donosi odluku o izmjeni iznosa pokrića osiguranih prikladnih depozita na prijedlog direktora Agencije;
- m) donosi odluku o visini naknade za certifikat u članstvu za banke članice, a na prijedlog direktora Agencije;
- n) odobrava plaće i beneficije za sve uposlene u Agenciji, a na prijedlog direktora Agencije, ako nije drugačije propisano državnim zakonom ili propisom;
- o) donosi sve potrebne propise i uputstva o radu samog Upravnog odbora;
- p) godišnje odobrava imenovanje vanjskog revizora Agencije, a na prijedlog direktora Agencije;
- r) donosi odluku o imenovanju nezavisnog revizora u slučaju sukoba s bankom članicom u vezi s tačnosti izvještaja u skladu s ovim zakonom;
- s) usvaja Strateški plan Agencije, Plan za krizne situacije i ciljani iznos Fonda;
- t) donosi odluku o korištenju sredstava Fonda za potrebe restrukturiranja banke članice.

Član 30.
(Izvještavanje)

- (1) Upravni odbor odgovoran je za aktivnosti Agencije.
- (2) Upravni odbor usvaja godišnji izvještaj o radu i finansijski plan za narednu godinu, u roku od tri mjeseca po završetku prethodne kalendarske godine i dostavlja ga na objavu u „Službeni glasnik BiH”.
- (3) Upravni odbor dostavlja primjerak godišnjeg izvještaja o radu i finansijskog plana Predsjedništvu Bosne i Hercegovine, u formi informacije, u roku od tri mjeseca od završetka prethodne kalendarske godine.

Član 31.

(Imenovanje direktora Agencije i direktora filijale)

- (1) Upravni odbor imenuje direktora Agencije i direktore filijale na mandat od pet godina. Direktor Agencije i direktori filijala mogu biti ponovo imenovani od Upravnog odbora bez ograničenja na broj imenovanja, ali se proces potvrde mora ponoviti prilikom svakog imenovanja.
- (2) U slučaju da pozicija direktora Agencije ili direktora filijale ostane upražnjeno, Upravni odbor dužan je imenovati novo lice na tu dužnost u roku od 60 dana.
- (3) U slučaju da Upravni odbor ne izvrši imenovanje direktora Agencije ili direktora filijale u roku iz stava (2) ovog člana, predsjedavajući Upravnog odbora imenuje direktora Agencije ili direktora filijale na privremenoj osnovi, do okončanja postupka imenovanja od Upravnog odbora.
- (4) Lice koje je, na privremenoj osnovi, imenovao predsjedavajući Upravnog odbora, u skladu sa stavom (3) ovog člana, imaju puna ovlaštenja za vršenje dužnosti, u skladu s ovim zakonom.
- (5) Direktor Agencije i direktor filijale sami ili neko s njima vezan po krvi ili u braku ne može biti član nadzornog ili upravnog odbora banke članice ili neke druge banke ili nekog njima vezanog, krvno ili u braku, do trećeg stepena srodstva.
- (6) Direktor ili direktori filijala ne mogu posjedovati, sami ili neko s njima vezan, po krvi ili u braku, do trećeg stepena srodstva, direktno ili indirektno više od pet procenata kapitala banke članice.
- (7) Direktor i direktori filijale dužni su pismeno obavijestiti Agenciju o interesima koje oni sami ili neko s njima vezan, krvno ili u braku, do trećeg stepena srodstva, imaju u banci članici ili nekoj drugoj banci ili komercijalnom preduzeću, u kojem posjeduju udio u kapitalu banke ili posjeduju više od pet procenata kapitala preduzeća, ili o članstvu u nadzornom ili upravnom odboru komercijalnog preduzeća.
- (8) Direktor Agencije i direktor filijale neće prihvatiti položaj u banci članici u roku dvije godine nakon završetka zaposlenja u Agenciji, bez prethodnog pismenog odobrenja Upravnog odbora Agencije.

Član 32.

(Dužnosti direktora Agencije)

- (1) Direktor Agencije predstavlja i zastupa Agenciju, rukovodi radom Agencije i odgovara za poslovanje Agencije.
- (2) Direktor Agencije vrši sljedeće dužnosti:
 - a) predlaže Upravnom odboru učešće banke u članstvu ili prestanak članstva banke članice;
 - b) predlaže Upravnom odboru sva pojedninačna akta vezano za banke članice;
 - c) predlaže Upravnom odboru sva opća akta, pravila, uputstva o bankama članicama;
 - d) predlaže Upravnom odboru finansijski plan Agencije i politiku investiranja sredstava Fonda;
 - e) zastupa Agenciju u odnosima s bankama članicama i svim drugim institucijama;
 - f) provodi sve politike i odluke koje je donio Upravni odbor;

- g) utvrđuje i odobrava odgovarajuću stručnu kvalificiranost osoblja Agencije ispod nivoa direktora filijala;
 - h) odlučuje o zasnivanju i prestanku radnog odnosa svih uposlenih ispod nivoa direktora organizacionih jedinica uz konsultacije s direktorima filijala, u skladu s državnim zakonom ili propisom;
 - i) predlaže Upravnom odboru Agencije plaće i beneficije za sve uposlene Agencije, u skladu s državnim zakonom ili propisom;
 - j) najmanje jedanput godišnje razmatra visinu stope premije osiguranja koja se naplaćuje bankama članicama i daje Upravnom odboru prijedlog u vezi s njom;
 - k) predlaže Upravnom odboru donošenje odluke o vanrednoj premiji osiguranja;
 - l) predlaže Upravnom odboru Agencije izbor vanjskog revizora Agencije;
 - m) predlaže Upravnom odboru Agencije izbor nezavisnog revizora u slučaju sukoba s bankom članicom u vezi s tačnošću izvještaja, a u smislu ovog zakona;
 - r) predlaže Upravnom odboru izmjene iznosa pokrića osiguranog depozita;
 - s) predlaže Upravnom odboru donošenje Odluke o standardima kvalitata poslovanja banaka članica;
 - t) redovno razmatra funkcionalnu održivost sistema isplate,
 - u) predlaže Upravnom odboru usvajanje strateškog plana, Plana za krizne situacije i ciljanog iznosa Fonda
 - v) predlaže Upravnom odboru donošenje odluke o korištenju sredstava Fonda za potrebe restrukturiranja banke članice.
- (2) Direktor filijale Agencije rukovodi i organizira rad filijale i pomaže direktoru Agencije u obavljanju njegovih dužnosti iz stava (1) ovog člana. U slučaju službenog odsustva, dužnost direktora Agencije vrši jedan od direktora filijale, kada mu direktor prenese to ovlaštenje. Dužnosti direktora Agencije iz stava (2) ovog člana direktor Agencije može prenijeti na direktora filijale kao pojedinačno ovlaštenje ili kao ovlaštenje koje on dijeli s direktorom Agencije.
- (3) Direktor Agencije prenosi ovlaštenja na direktora filijale u pisanoj formi. Dato ovlaštenje može se povući u svakom trenutku, uz odgovarajuće pisano obavještenje. Direktor Agencije može prenijeti ovlaštenje samo na direktora filijale.
- (4) Direktor Agencije kontinuirano informira direktore filijala o svim aspektima poslovanja Agencije, kako bi direktori filijala mogli preuzeti obaveze direktora u skladu s stavom 4. ovog člana.
- (5) Direktor Agencije i direktori filijala učestvuju u radu Upravnog odbora ali nemaju pravo glasa u Upravnom odboru.
- (6) Direktor Agencije i direktori filijala su za svoj rad odgovorni Upravnom odboru.
- (7) Direktor Agencije konsultuje se s direktorima filijala, kao i s drugim odgovarajućim osobljem Agencije prilikom donošenja odluka u vezi s poslovanjem Agencije ili pripreme prijedloga Upravnom odboru. Sve odluke i prijedlozi predstavljaju konačno ovlaštenje i odgovornost direktora Agencije.

Član 33.

(Poslovna tajna Agencije)

- (1) Član Upravnog odbora Agencije, direktor Agencije, direktor filijale, svi uposleni Agencije i lica koja je angažirala Agencija u svom poslovanju, kao i druge osobe koje obavljaju poslove na kratkoročnoj osnovi obavezni su, kao poslovnu tajnu, čuvati sve informacije do kojih dođu u okviru svog posla.
- (2) Obaveza iz stava (1) ovog člana traje i po prestanku radnog odnosa, angažmana ili članstva u Upravnom odboru ili zaposlenja bilo koje vrste u Agenciji.
- (3) Agencija može odobriti otkrivanje poslovne tajne u krivičnom postupku pred nadležnim sudom za lica iz stava (1) ovog člana.

Član 34.

(Finansiranje Agencije)

- (1) Operativni troškovi Agencije finansiraju se iz prihoda od naknada, članarine i prihoda od investicija kapitala Fonda.
- (2) Odluku o naplati članarine, visini i modalitetima naplate donosi Upravni odbor. Odluka se objavljuje u „Službenom glasniku BiH“.
- (3) Sredstva s operativnog računa Agencije mogu se koristiti isključivo za operativne troškove Agencije, a sredstva koja čine račun Fonda mogu se koristiti jedino za isplatu osiguranja depozita u slučaju isplate osiguranja i postupka restrukturiranja banaka članica.
- (4) Za finansiranje operativnih troškova Agencije mogu se koristiti sredstva iz donacija. Za sve donacije i uslove vezane za njih, koji nisu uključeni u odobreni finansijski plan Agencije, potrebno je odobrenje Upravnog odbora.
- (5) Godišnje, višak prihoda nad rashodima Agencije dobijenih iz izvora iz st. (1) i (3) ovog člana, raspoređuje se u Fond odlukom Upravnog odbora na prijedlog direktora Agencije. Višak prihoda nad rashodima može se koristiti i za pokriće eventualnih gubitaka koji mogu nastati u radu Agencije.
- (6) Sve premije koje uplaćuju banke članice dodaju se Fondu.
- (7) U slučaju kada korištenje prihoda Agencije, u skladu sa st. (1) i (3) ovog člana nije dovoljno za finansiranje operativnih troškova Agencije, Upravni odbor, na prijedlog direktora Agencije, može donijeti odluku o privremenoj upotrebi uplata premija osiguranja u svrhu osiguranja potrebnih sredstva. Odluka važi za period utvrđen odlukom Upravnog odbora i u tom roku se privremeno upotrebljena sredstva vraćaju u Fond, a primjenjuje se samo ako je Agencija iscrpila sve praktične načine umanjenja operativnih troškova.
- (8) U slučaju kada sredstva Fonda nisu dovoljna za ispunjavanje obaveza Agencije u vezi s isplatom osiguranih depozita i doprinosa u postupku restrukturiranja, a sve odredbe ovog člana su iscrpljene, Agencija, u okviru ograničenja državnog zakonodavstva, može osigurati kredite i garancije ili izdati dužničke hartije od vrijednosti za osiguranje potrebnih sredstava. U tom slučaju, Upravni odbor Agencije, na prijedlog direktora Agencije, može odobriti upotrebu budućih potraživanja premije osiguranja kao garanciju i budućih naplata premija osiguranja kao izvor otplate duga Agencije.

Član 35.

(Saradnja s agencijama za bankarstvo)

- (1) Agencija i agencije za bankarstvo uspostaviti će na osnovu uzajamnosti, potrebnu i blagovremenu saradnju na redovnoj osnovi i razmjenu informacija bitnih za provedbu njihovih zakonom propisanih zadataka.
- (2) Saradnja i razmjena informacija iz stava (1) ovog člana detaljnije će se regulisati sporazumom o saradnji između Agencije i agencija za bankarstvo.
- (3) Ukoliko Agencija dobije povjerljivu informaciju od nadležne agencije za bankarstvo tu informaciju će tretirati kao poslovnu tajnu Agencije u skladu sa članom 25. ovog zakona. Informacija se može otkriti samo uz prethodnu saglasnost nadležne agencije za bankarstvo koja je dostavila tu informaciju i isključivo u svrhu za koju je nadležna agencija za bankarstvo dala saglasnost.
- (4) Agencija se neće smatrati odgovornom za aktivnosti koje preduzmu agencije za bankarstvo na osnovu informacija koje je dostavila Agencija, niti Agencija smatra agencije za bankarstvo odgovornim za odluku koju je donijela Agencija na osnovu informacija koje je primila od agencija za bankarstvo.
- (5) Agencija će od strane nadležne agencije za bankarstvo biti informirana o planiranim mjerama restrukturiranja banke članice.
- (6) Ako se u procesu restrukturiranja banke članice trebaju osigurati sredstva iz Fonda, Agencija je dužna da na zahtjev entitetske agencije za bankarstvo da mišljenje o procjeni troškova i mogućnosti isplate osiguranih depozita radi utvrđivanja mogućnosti sprovođenja postupka likvidacije ili stečaja banke, odnosno o procjeni mogućeg obima finansiranja restrukturiranja banke sredstvima Fonda.
- (7) Agencija će nadležnoj entitetskoj agenciji za bankarstvo dostaviti mišljenje iz stava 5 ovog člana, u roku od 24 sata od podnošenja zahtjeva entitetske agencije za bankarstvo.
- (8) Na zahtjev nadležne agencije za bankarstvo, Agencija će dostaviti potrebne informacije za obračun iznosa hipotetičke likvidacije.
- (9) Nakon što nadležna agencija za bankarstvo zvanično obavijesti Agenciju o donešenju formalne odluke o restrukturiranju banke članice i iznosu koji treba da bude obezbijeđen iz Fonda, Agencija će osigurati da u roku od 48 sati sredstva za finansiranje restrukturiranja banke članice budu obezbijeđena.

Član 36.

(Saradnja sa Centralnom bankom Bosne i Hercegovine)

- (1) Agencija, na uzajamnoj osnovi, Centralnoj banci Bosne i Hercegovine dostavlja informacije do kojih je došla u vršeci ovlaštenja propisana ovim zakonom.
- (2) Agencija se neće smatrati odgovornom za radnje koje Centralna banka Bosne i Hercegovine preduzme na osnovu informacija koje joj dostavi Agencija.
- (3) Centralna banka Bosne i Hercegovine će, na uzajamnoj osnovi, Agenciji dostavljati izvještaje i informacije sa kojima raspolaže, a koji su Agenciji potrebni radi praćenja poslovanja banaka.

Član 37.
(Prekršaji)

- (1) Novčanom kaznom od 40.000,00 KM do 200.000,00 KM kazniće se za prekršaj banka članica ako:
- a) ne dostavi ili neblagovremeno dostavlja izvještaje Agenciji;
 - b) ne uplaćuje premije osiguranja po dospelju;
 - c) ne plaća naknadu za izdati certifikat;
 - d) ne plaća članarinu;
 - e) ne istakne znak Agencije i promotivni materijal kao dokaz o članstvu u programu osiguranja depozita;
 - f) odbije pristupiti ugovoru o osiguranju depozita;
 - g) dostavi Agenciji netačne informacije;
 - h) ako u reklamne svrhe upotrebljava informacije o osiguranju depozita utvrđene u ovom zakonu na način koji ugrožava stabilnost bankarskog sistema i povjerenje deponenata;
- (2) Novčanom kaznom u iznosu od 2.000,00 KM do 10.000,00 KM za prekršaje iz stava (1) ovog člana, kazniće se član uprave banke članice.
- (3) Novčanom kaznom u iznosu od 2.000,00 do 10.000,00 KM za prekršaje iz stava (1) ovog člana kazniće se član nadzornog odbora banke članice.

Član 38.
(Prekršajni postupak)

- (1) Prekršajni postupak se pokreće i vodi u skladu sa propisima kojima se uređuje prekršajni postupak.
- (2) Utvrđivanje odgovornosti i izricanje mjera u skladu sa ovim zakonom ne isključuje utvrđivanje odgovornosti i izricanje mjera utvrđenih drugim zakonima.

Član 39.
(Prestanak rada Agencije)

- (1) U slučaju da Agencija obustavi poslovanje iz razloga koji nije vezan za obavezu isplate osiguranja, sredstva Agencije raspoređuju se na slijedeći način:
- a) isplaćuju se sve zakonskih obaveza Agencije, uključujući neplaćene plaće i beneficije uposlenih;
 - b) do raspoloživog iznosa, vrši se povrat sredstava donatorima do visine glavnice njihovih donacija ili na osnovu proporcionalnosti, ukoliko se ne mogu vratiti glavnice svih doniranih sredstava;
 - c) preostala sredstva vraćaju se bankama članicama na osnovu proporcionalnosti za uplaćene premije banaka članica.
- (2) Upravni odbor može preuzeti radnje reorganizacije organizacionog i poslovnog aranžmana Agencije, uz izmjenu ovog zakona u dijelu ili cjelokupno. U tom slučaju, Agencija nastavlja svoje poslovanje na način propisan ovim zakonom, a izmjene koje trebaju stupiti na snagu

zbog nastale promjene u organizacionom poslovanju Agencije, Agencija šalje u državnu zakonodavnu proceduru u roku od šest mjeseci od dana kada je Upravni odbor Agencije odobrio organizacioni i poslovni aranžman Agencije.

POGLAVLJE IV. PRIJELAZNE I ZAVRŠNE ODREDBE

Član 40.

(Prestanak važenja zakona)

Danom stupanja na snagu ovog zakona prestaje da važi Zakon o osiguranju depozita u bankama Bosne i Hercegovine („Službeni glasnik BiH“, br. 20/02, 18/05, 100/08, 75/09 i 58/13).

Član 41.

(Stupanje na snagu)

Ovaj zakon stupa na snagu osmog dana od dana objavljivanja u „Službenom glasniku BiH“, a bit će objavljen i u službenim glasilima entiteta i Brčko Distrikta Bosne i Hercegovine.

OBRAZLOŽENJE ZAKONA O OSIGURANJU DEPOZITA U BANKAMA BOSNE I HERCEGOVINE

I. USTAVNI OSNOV ZA DONOŠENJE ZAKONA

Ustavni osnov za donošenje predloženog zakona utvrđen je Ustavom Bosne i Hercegovine i to članom IV. 4. a) kojim je određena nadležnost Parlamentarne skupštine Bosne i Hercegovine za donošenje zakona koji su potrebni za provođenje odluka Predsjedništva ili za vršenje funkcije Skupštine.

II. RAZLOZI ZA DONOŠENJE ZAKONA

U cilju doprinosa očuvanja cjelokupne finansijske stabilnosti i sagledavanja uloge i značaja Agencije za osiguranja depozita Bosne i Hercegovine kao neizostavnog dijela finansijskog sektora,

kontinuirano se prati aktuelnost primjene važećeg zakona i sagledava potreba usklađenosti sa odgovorajućim EU direktivama iz oblasti zaštite depozita te se donošenje Zakona predlažu prvenstveno iz tih razloga. Dalji razlog predloženih izmjena jesu i obaveze koje je Bosna i Hercegovina preuzela iz Pisma namjera potisanim sa MMF-om te tehničke korekcije Zakona.

III. PRINCIPI NA KOJIMA JE ZASNOVAN PRIJEDLOG ZAKONA

Principi na kojima je zasnova Prijedlog zakona su princip ustavnosti i zakonitosti, princip transparentnosti, princip zaštite javnog interesa i princip fiskalne odgovornosti.

IV. OBRAZLOŽENJE ČLANOV PRIJEDLOGA ZAKONA

Za član 1. - utvrđuje se okvir primjene zakona, osnivanje, status, djelatnost, upravljanje i rukovođenje, ovlaštenja, obaveze i finansiranje Agencije kao i cilj zakona zaštita deponenata i očuvanje finansijske stabilnosti.

Za član 2. – definišu se pojmovi koji se koriste u Prijedlogu zakona.

Za član 3. – usklađivanje sa Jedinstvenim pravilima za izradu pravnih propisa u institucijama Bosne i Hercegovine.

Za član 4. - utvrđuje se princip osiguranja svih prikladnih depozita kod banaka članica

Za član 5. – određuju se ograničenja osiguranja depozita kroz određivanje limita osiguranja, isplate u konvertibilnim markama i datuma obračuna kamate do dana oduzimanja dozvole za rad banci članici.

Za član 6. - određuju su isključenja iz osiguranja na način da se isključuju depoziti banaka, mikrokreditnih organizacija, vladnih tijela, investicionih fondova, osiguravajućih društava, lica u posebnom odnosu sa bankom i slično.

Za član 7. – određuje se učešće u članstvu osiguranja depozita i princip obaveznog članstva za sve banke u Bosni i Hercegovini koje imaju dozvolu za rad izdatu od strane nadležne agencije za bankarstvo.

Za član 8. – određuje se praćenje kvaliteta poslovanja banaka članica radi ispunjevanja zakonskog mandata Agencije, isplate osiguranih depozita, utvrđivanja potencijalne obaveze, obračuna premije, diferencirane premije, ciljanog iznosa Fonda.

Za član 9. - određuje se izvještavanje koje banke članice vrše prema Agenciji u smislu tačnosti, blagovremenosti i dostupnosti podataka-

Za član 10. – određuje se obaveza potpisivanja ugovora o članstvu i izdavanje certifikata o članstvu.

Za član 11. – određuje se obaveza Agencije da bankama članicama obezbjedi promotivni materijal kako bi se deponentima pružilo što više informacija o osiguranju depozita.

Za član 12. - određuje obavezu banaka članica na plaćenje premije osiguranja, njene osnovice, visine, naplate, definisanje diferencirane i vanredne premije osiguranja.

Za član 13. – određuje Fond za osiguranje depozita, sastav sredstava Fonda, investiranje sredstava Fonda.

Za član 14., 15. i 16. – određuje se prestanak članstva uz isplatu osiguranih depozita, kada nastaje, rok za stavljanje na raspolaganje osiguranih depozita (dvadeset radnih dana), obaveze deponenata, te subrogacija tj. prenos prava deponenata na Agenciju za isplaćeni iznos depozita.

Za član 17., 18., 19. i 20. – detaljnije se uređuje suspenzija banaka članica ukoliko ne izvršavaju obavezu plaćanja premije osiguranja.

Za član 21. - određuju se uslovi za krištenje Fonda u procesima restrukturiranja banke članice i to: U cilju očuvanja finansijske stabilnosti novim zakonima o bankama predviđen je rezolucioni proces kojim se kroz restrukturiranje poslovanja banaka pomaže stvaranju samoodržive banke te je jedan od izvora sredstava Fond za osiguranje depozita. Odluku o upotrebi sredstava bi donosio Upravni odbor Agencije, ista bi davala svoje mišljenje rezolucionom tijelu pri agencijama za bankarstvo, koje bi i donosile odluku o odobravanju restrukturiranja.

Zaštitni mehanizmi Fonda za osiguranje depozita u procesima finansiranja restrukturiranja su:

- Finansiranje procesa podrazumjeva da će za Fond za osiguranje depozita biti isto ili povoljnije učestvovati u procesima restrukturiranja banaka u odnosu na likvidaciju ili stečaj (uključivanje do visine očekivanog gubitka). Za ove ocjene se koriste nezavisne procjene imovine i obaveza banaka definisane zakonima o bankama;
 - Visina doprinosa Fonda za osiguranje depozita ograničena je na 50% ciljanog iznosa Fonda;
 - Mišljenje Agencije o procesima restrukturiranja, pogotovu u odnosu na hipotetičku likvidaciju ili stečaj;
 - Upravni odbor Agencije kao najviši organ upravljanja donosi odluku o upotrebi sredstava Fonda;
 - U slučaju da Fond za osiguranje depozita pretrpi veće gubitke nego što bi pretrpio u procesima likvidacije ili stečaja isti ostvaruje pravo na nadoknadu razlike iz sredstava vanredne premije.
- Navedena rješenja su u skladu sa EU direktivom iz oblasti zaštite depozita i sanacije i oporavka banaka.

Za član 22. – određuje se uspostavljanje Agencije, njeno definisanje kao samostalne neprofitne pravne osobe organizaciona oblik struktura sastavljen od sjedišta i dvije filijale.

Za član 23. – određuju se osnovni zadaci Agencije kroz osiguranje prikladnih depozita, izdavanje certifikata o članstvu bankama članicama, oduzimanje putem suspenzije certifikata o

članstvu, investiranje sredstava Fonda, isplata osiguranih depozita, učešće u postupku restrukturiranja banaka članica, donošenje podzakonskih akata.

Za član 24. – definiše se samostalnost u radu Agencije i imunitet biviših i sadašnjih zaposlenika Agencije za postupanje u dobroj namjeri prilikom obavljanja svoje dužnosti.

Za član 25. – definiše se donošenje Statuta Agencije i njegov obavezni sadržaj.

Za član 26., 27., 28 i 29.- određuje se Upravni odbor kao jedini organ upravljanja, njegov sastav, institucije koje su ovlaštene za imenovanje članova Upravnog odbora, smjenjivanje, suspenzija i otpuštanje članova Upravnog odbora, način održavanja sjednica i utvrđivanje kvoruma te nadležnost Upravnog odbora.

Za član 30. – određuje se izvještavanje Agencije prema Predsjedništvu BiH.

Za član 31. i 32. – određuju se organi rukovođenja Agencijom, njihovo imenovanje i zadaci.

Za član 33. - određuje se poslovna tajna Agencije.

Za član 34.- određuje se finansiranje Agencije, njeni izvori kao i izvori ukoliko nedostaju sredstva za njen operativni rad ili za isplatu osiguranih depozita i učešća u postupku restrukturiranja.

Za član 35. – detaljnije se definiše i uređuje saradnja sa entitetskim agencijama za bankarstvo kao u pogledu redovnog poslovanja tako i za slučaj likvidacije ili učešća u postupku restrukturiranja banke članice.

Za član 36. – definiše se saradnja sa Centralnom bankom BiH.

Za član 37.- definišu se prekršaji ovog zakona i kazne za iste.

Za član 38. - definišu se vođenje postupka i organi za vođenje prekršajnog postupka.

Za član 39. – definiše se prestanak rada Agencije.

Za član 40.- definiše se prestanak važenja dosadašnjeg zakona.

Za član 41. - definiše se stupanje na snagu zakona.

IV. FINANSIJSKA SREDSTVA

Za provođenje ovog zakona nije potrebno osiguravati sredstva u budžetu institucija i međunarodnih obaveza Bosne i Hercegovine.

